

ՎԱՀԱՆ ՏԵՐՅԱՆ

(Ծննդյան 90-ամյակի առթիվ)

Բանասիր. դիտ. դոկտոր Ս. Բ. ԱՂԱԲԱՅԱՆ

Հովհաննես Թումանյանի պարբերացումով XIX—XX դդ. արևելահայ շրջանի անցել է զարգացման երեք շրջան. «1857 թ. ուսանող Ռ. Պատկանյանը — Գամառ Քաթիպան հրատարակել է իր «Ազգային Նրդարան» անունով բանաստեղծությունների տետրակն ու նրանով սկիզբն է դրել առաջին շրջանի բանաստեղծության:

Նրանից երեսուն տարի հետո, 1887 թվականին ուսանող Հ. Հովհաննիսյանը հրատարակեց իր բանաստեղծությունների առաջին դիրքը ու սկիզբն առավ երկրորդ շրջանի բանաստեղծությունը:

Հովհաննիսյանից երեսուն տարի հետո էլ, 1908 թվականին դարձյալ ուսանող՝ Վ. Տերյանը հրատարակեց իր «Մթնշաղի անուրջները» ու առաջ եկավ երրորդ, նորագույն շրջանը»¹:

Թումանյանական այս պարբերացումը հենվում էր ոչ միայն առանձին շրջանները ներկայացնող բանաստեղծների արժարժած նյութերի տարբերությունների վրա, այլև բանաստեղծական մտածողության ուղղակի կերպարանափոխությունների:

Ռաֆայել Պատկանյանի «Ազատ երգերի» և Սմբատ Շահազիզի «Ազատության ժամերի» ազգային նվազներից ու դրանց համապատասխանող զրբբային արտահայտչաձևերից, Հովհ. Հովհաննիսյանի «Բանաստեղծությունների» և Ավ. Իսահակյանի «Երգեր ու վերքերի» բնաշխարհիկ լարերից ու դրանց հարուցած ժողովրդական կենդանի խոսքի հնչերանգից հետո Վահան Տերյանը, արդարև, բերեց նախորդներից տարբերվող բանաստեղծական նոր որակ:

Վահան Տերյանը բազմադարյա հայ բանաստեղծության ուղիներում հաստատեց նրա նոր Սկիզբը:


1

Հայ հասարակության պատմության մեջ դժվար է մատնանշել ավելի բարդ ժամանակաշրջան, քան XX դարի առաջին երկու տասնամյակներն էին: Եվ դա ոչ միայն բաղաբական-սոցիալական իրադրության իմաստով, այլև մշակութային-գեղարվեստական խմորումների: Հին արժեքների վերադասարանության ժամանակաշրջան էր դա. հասարակական կյանքը շնչում էր նոր գաղափարներով, արմատապես նորոգվում էին գեղարվեստական ճաշակն ու

¹ Հ ո Վ Տ. Թ ու մ ա ն յ ա ն, Երկերի ժողովածու, Զորրորդ հատոր, 1951, էջ 381:

գեղադիտական ըմբռնումները: Ժամանակի գեղարվեստը տենդագին որոնում էր նոր ուղիներ՝ պատմական իրադրության հարուցած հոգևոր պահանջները յուրացնելու համար:

Հայ իրականության մեջ նոր ուղիներ բացողներից մեկը եղավ Վահան Տերյանը՝ «Մթնշաղի անուրջներ» (1908) և «Բանաստեղծություններ» (1912) գրքերով, ուր առավել խորությամբ ու ամբողջական ձևով արտահայտվեցին



Ժամանակի տաղնապներն ու հոգսերը: Լազարյան ձեմարանում կատարած բանաստեղծական առաջին փորձերից հետո, ուր ակներև էր թումանյանական-իսահակյանական հայտնի տպավորությունների ոճական բեռը, Վահան Տերյանը՝ արդեն Մոսկվայի համալսարանի ուսանող, շուտով տպագրեց իր առաջին հավաքածուն՝ զտարյուն տերյանական գույներով ու նվազներով:

«Մեր դրականության պատմությունը, — հիշում է Ստեփան Զորյանը, — չի տեսել երևի բանաստեղծական երկի այնպիսի սրտագին ընդունելություն, որին արժանացավ Տերյանի «Մթնշաղի անուրջներ» ժողովածուն... Պահ մի մոռացվեցին մեր անվանի բանաստեղծները. ամենուրեք՝ երեկույթներում, ընտանիքներում, ընկերական շրջաններում արտասանում էին Տերյանի սոնետներն ու էլեգիաները: Սկսվել էր պարզապես տերյանական շրջան, Տերյանի էպոխա: Օդը լիքն էր Տերյանով»²:

Հայ բանաստեղծության «տերյանական շրջանի» գնահատողների մեջ էին նաև Հովհ. Թումանյանն ու Ավ. Իսահակյանը՝ իր ավագ ժամանակակից-

² Ստեփան Զորյան, Երկերի ժողովածու, հատ. X, 1964, էջ 164—165:

ները, որոնք անսխալ նկատեցին տերյանական նվազների միանգամայն նոր բովանդակությունը և «ձևերի բյուրեղացումը»:

2

Վահան Տերյանի զրական կենսագրությունը սկսվեց այն թվականներին, երբ թե՛ Ռուսաստանում, թե՛ եվրոպական երկրներում ասպարեզը նվաճել էին նորագույն հոսանքները ներկայացնող գեղագետները. Կնուտ Համսունը՝ Բնության հովանավոր Պանի մեծարանքով, Հենրիկ Իբսենը՝ Պյեր Գյունտին երազող Սուվլեյգի հավերժական անուրջով, Շարլ Բոդլերը՝ իր «Ցավի ծաղիկներով», Մորիս Մետերլինկը՝ Կապուլտ Բոչունի հեքիաթով, Անդրեյ Բլեյն՝ Ոսկեգեղձը փնտրող ժամանակակից արգոնավորդներով, Ալեքսանդր Բլոկը՝ Հրաշալի Անծանոթուհու և Զյունե դիմակի խորհրդապատկերներով, Պոլ Վերլենը՝ աշխարհի աշնանացման տրտում նվազներով, Ֆյոդոր Սոլոգուբը՝ «Աստծո հանձնակատար» արևի դեմ ուղղված խռովությանը, Ստեֆան Մալարմեն՝ ինքն իրեն սիրահարված և ամբողջ աշխարհը այդ սիրո մեջ սուզած նարցիսի խորհրդանշանով, Վալերի Բրյուսովը և Վլադեսլավ Իվանովը, Գերհարդ Հաուպտմանն ու Օսկար Ուալդը, Ստանիսլավ Պշիբիշևսկին և Արթուր Շնիցլերը: Դեղագետներ, որոնք իրենց ամուր կնիքը դրին նաև XX դարի սկզբի հայ գեղարվեստական կյանքի վրա, այս կամ այն չափով հրահրեցին նոր որակի ծնունդը:

Վահան Տերյանը, անտարակուսելիորեն, շնչում էր այդ մթնոլորտում: Նրա նամակներից, հատկապես Անթառամ Միսկարյանին գրած նամակներից, որ 1970-ին իր առաջաբանով հրապարակեց բանաստեղծի դուստրը՝ Նվարդ Տերյանը, «Գարուն» ամսանախի հրատարակությանը վերաբերող ղանադան գրություններից, 1914-ին Թիֆլիսում կարդացած «Հայ գրականության գալիք օրը» դասախոսության ընտիր վերլուծություններից, իր «Թարգմանական գործից» (Թարգմանել է Բոդլեր, Ուալդ, Վերլեն, Բրյուսով, Սոլոգուբ և այլն), Մոսկվայի «Պանթեոն» հրատարակչության գեղեցիկ ծրագրերից երևում է, որ Վահան Տերյանը խորապես ապրել է նորագույն հոսանքների, մասնավորապես ֆրանսիական և ռուսական սիմվոլիստների, գեղարվեստական ներշնչանքներով:

Դեռ ավելին. «Մինչաղի անուրջները» գրելիս նա ուղղակիորեն դիմել է սիմվոլիստական ուղղության սկզբնաղբյուրներին՝ մտապատկերներին ու խորհրդանշաններին: Հայտնի է, օրինակ, Մինչաղի ու Մայրամուտի բանաստեղծական սիմվոլացման բողբոջան նախասիրությունը («Իրիկնային մթնշաղ», «Իրիկնային դաշնություն», «Օրվա վախճանը», «Արևի ռոմանտիկական թաղումը» բանաստեղծություններում):

Բոդլերը, իսկ ավելի ուշ՝ Բլոկը իր մայրամուտային բանաստեղծություններով («Իրիկնային մթնշաղի ժամերին», «Խաղաղ են իրիկնային ստվերները», «Նորից մոտ են իրիկնային ստվերները» և այլն) փորձում էին, ռոմանտիկական թեթև շղարշով, հաստատել բնության՝ խաղաղ անրջող մայրամուտի և բանաստեղծի հոգու դաշինքը: Նույնպիսի երևույթ տեղ է գտնում նաև Տերյանի մինչաղային բանաստեղծություններում:

Կյանքը լուռ է, աղմուկը մեռնում,
Մի անձանոթ ձեռք նուրբ մրնշաղում
Անցյալն ու ներկան իրար է խառնում,
Իմ սրտում ոսկե անձրև է մաղում:

Մի բնույշ լույս կա իմ հոգու համար—
Ամեն ինչ ունի շմեռնող մի կյանք,
Կա խորհրդավոր դյուրող մի խավար,
Ուր րախտից փաղցր են տրտունջ ու տխրանք:

Մի փաղցր վիշտ կա անդառն անցածում,
Վերհուշերի մեջ—մի անսուտ դրախտ,
Մի անանց վայելք, անխաբ ճիացում—
Կյանքից գեղեցիկ ցնորական րախտ...

Իրիկնաժամերի թավշյա նվաղներից դատ, եթե հիշենք նաև աշխարհի աշնանացման վերլենյան բանաստեղծությունների արձագանքը («Աշուն է, անձրև...», «Կրկին իմ հոգում...», «Յրտահա՛ր, հողմավա՛ր...»), Հրաշքի («Հրաշք աղջիկ, գիշերներիս թագուհի») և ճակատագրի՝ Fatum-ի («Կա-խարդական մի շղթա կա երկնքում...»), ցնորքների և աղոթքների («Նա մի անծանոթ երկրի աղջիկ էր», «Ես ընկա անդունդները խավար, իմ ցնորք, նորից թեզ եմ կանչում...»), ոսկեցու պատրանքների ու կապույտ տեսիլքների արծարծումները,— ապա պարզ կդառնա Վահան Տերյանի քնարի հարազատությունը սիմվոլիստական գեղագիտության որոշ սկզբունքների հետ: Անհերքելի իրողություն, որը, դժբախտաբար, հարցականի տակ են դնում Տերյանի ժառանգության երկարամյա հետազոտողները՝ երևի թե այն նպատակով, որ հերքեն «Տերյանը հայ բանաստեղծ չէ» վաղածանոթ լեզենդը և հաստատեն նրա քնարի «բացարձակ» անկախությունն ու ինքնուրույնությունը:

Վահան Տերյանը հայ բանաստեղծության մեջ ամրացնելով XX դարի 900—10-ական թթ. տիրապետող ուղղության պատկերային մտածողության որոշ գծերը, երազների և հույսերի լեզվով խոսող արվեստի կառուցվածքային տարրերը, այդուամենայնիվ, մնաց իրականության հողի վրա՝ իր քնարը հեռու պահելով այդ հոսանքի «ուղղափառ» թևի բանաստեղծներին հատուկ կրոնական-միստիկական բովանդակությունից, իրական աշխարհի մերժման և հավելյալ աշխարհների սրբազործման մոտիվներից: Տերյանական խորհրդապատկերների ու փոխառյալ սիմվոլիստական նշանագրերի ետևում միշտ էլ կանգնած են եղել իր ժամանակակիցները՝ ուղեմոլոր, դժգոհ, խաչված ու բեկված հոգիները, իրենց տառապանքներով ու ցավերով, անուրջներով ու պատրանքներով, տրտմությամբ ու տխրությամբ:

Վահան Տերյանը իր սերնդի, 1905 թ. հեղափոխության պարտությունից հետո իր ոսկե պատրանքները այլևս խորտակված տեսած սերնդի, տրտմու-րյալ բանաստեղծն է, հույսերի ու սպասումների արտահայտիչը:

Մթնշաղների ու իրիկնաժամերի տերյանական մեծարանքը՝ «Ես սիրում եմ մթնշաղը նրբակերտ», բնավ առնչություն չունի հետադիմական ուման-տիկների և ուղղափառ, ավարտված սիմվոլիստների «գիշերային հիմների» հետ, Անդոյությունը միակ ճշմարտություն և միակ ճանապարհ հռչակող նրանց դավանանքի հետ: Տերյանական նվաղներում՝ մթնշաղյան անուրջներում, բեկված հոգիների տրտմությունը երևան է գալիս ոչ թե խունապի

կյանքի անմեղքորդ ու բացարձակ ժխտման ձևով, այլ ազգնապի ահաղանգերով:

Տրտմության հետ, բանաստեղծությունների նույն համակարգում՝ տաղնապի շեշտեր, անշատման վհատ ուղիղությունների կողքին՝ լույսի և արևի կարոտ, աշնանային հնազանդ (Resignation) տրամադրությունների կողքին՝ զարնան զվարթ աղբյուրների օրհնություն, մենության բանաստեղծացման հետ՝ կյանքի մեծարանք, գիշերվա պատկերների կողքին՝ լուսաբացյալ անուրջներ,— այսպիսին է տերյանական նվագների բարդ ելևէջը, որը հիմք է տվել նշանակալի Չարենցին՝ ասպարեզ հանելու Տերյանի հետևյալ սպառնալի բնութագրությունը՝ «սրտաբեկ, տխուր պոետ արևավոր»:

Տերյանի տխրությունը, ըստ էության, այն հիմքն էր, որի վրա տեղադրվեց մարդու և կյանքի նրա մեծ կարոտը («Օրհնություն քեզ կյանք, անուշ ու անհուն»), որի լիցքերով ու ազդակներով բանաստեղծի աշխարհում ոգի առան աշխարհահացումի տրամադրություններն ու տպավորությունները: Տերյանին է պատկանում իմաստուն խոսքը, թե՛ ամեն մի լուսաբաց գիշերվա տված լուսաբացն է. Այդ լուսաբացի համար է նա կյանքի ու առավոտվա հետ օրհներգում նաև գիշերային տանջանքը.

Օրհնություն և բեզ, տանջանքի գիշեր,—
նվ երկունք, և մահ,— փառք ու օրհնություն:

Վաճան Տերյանի բանաստեղծական աշխարհի և՛ տխուր, և՛ արևավոր գույների համագրությունը է բացատրվում նաև ֆանտաստիկական տեսիլքների գրաված լայն տեղը նրա չափատողերում.

Ես գիտեմ լուսեղեն մի երկիր,—
Ես գիտեմ դուրսկան մի հովիտ...

XX դարի արվեստում ֆանտաստիկական այն խարիսխն էր, ուր ապաստան էին գտնում գորշ ու սարսափելի իրականությունից երես դարձրած և հեռավոր հովիտներում փրկության ինչ-ինչ ուղիներ փնտրող անտուն թափառաշրջիկները, որոնց պաշարած տագնապները հարազատ էին նաև Տերյանի կենսագրությանը.

Ես անշատված եմ հայրենի հողից,
Հայրենի տունս՝ իմ սրտին օտար,
Ինձ աչքում է միշտ մի անհաղ յախիժ,—
Հավիտյա՞ն դուրսդ անհայտ նանապարհ...

Տերյանի թափառաշրջիկները «ամալի փողոցների անկյուններում» խաչված այն «ուրվականները» չեն, որոնց Ալեքսանդր Բլոկը 1906 թ. գրած մի հոդվածում դառն հեղանքով անվանում է «Երանելի արարածներ», նրանց համակած «դարի հիվանդության»՝ անտարբերության ու ապատիայի համար: Տերյանի թափառաշրջիկները մեծ քաղաքների սոցիալական այն շերտերն են, գերազանցապես մտավորական մարդիկ, որոնք ներկայացնում են հասարակական աններդաշնակությունները վերլուծող և այդ աններդաշնակությունների դեմ ըմբոստացող դարի պայթուցիկ ուժը: Դրանք իրենց հոգեկան կառուցվածքով ու հոգեկան մղումներով չափազանց մեծ հարազատություն

ունեն շխտովյան «մոռյլ», արտաքնապես խաղաղ, բայց ներքուստ պայթելու և ընդվզելու պատրաստ հերոսների հետ. իզուր չէ, որ Ա. Պ. Չխովը եղել է Տերյանի պատանեկան հափշտակությունը:

Թափառաշրջիկության հրեույթի արժարժումը Վահան Տերյանի համար ուղիղ ճանապարհ էր դեպի մարդը, դեպի մարդու դրաման ու հոգսը, որը XX դարի արվեստում, ինչպես նկատում են գրականության տեսարանները, «անցնում էր երկրորդ պլանով»։ Վ. Տերյանը ժամանակի հոգևոր դրաման արտահայտող, իրականության սոցիալական հակասությունները խտացնող, կյանքը վերլուծող այդ հերոսին բերեց առաջին պլան, հավասար բարձրության վրա դնելով Հրաշր-աղջկա՝ իր նվիրական երազանքները մարմնացնողի հետ:

3

Վահան Տերյանի բանաստեղծական զարգացումը հիմնական գծերով արտահայտում էր հասարակության զարգացման դինամիկան՝ անհույս սպասումներից մինչև վերածնության հավատ, անլույս գիշերներից մինչև լուսեղեն դարուններ, նկուն մորմոքներից մինչև զվարթ հուզապրումներ: Այս անցումները կային արդեն «Մինչաղի անուրջներ» շարքում, որի ամենավերջին՝ «Գարնանամուտ» բանաստեղծության մեջ Տերյանը ասպարեզ հանեց իր հոգեկան աշխարհի նորացման հետևյալ հրովարտակը.

Եվ ահա կրկին զվարթ ու ջանել,	Բացել ես իմ դեմ ոսկեղեն հեռուն.
Ինչու եյա տխուր մեճության բանտից.	Մաղկել ես սառում, անտառում, արտում...
Պայծառ աչքերդ ողջունում են ինձ,	Ուրեմ երգեր են հնչում իմ սրտում—
Եվ ես չեմ կարող իմ հիշը պահել:	Ողջո՛ւյն Բեզ արև՝, ողջո՛ւյն Բեզ. զարո՛ւն...

1912-ին հրատարակած «Բանաստեղծություններ» (Ա հատոր) գրքի նոր շարքերում թեև չեն նվազել տերյանական մորմոքները, ցավի ու դառնության նվազները, բայց և ավելի ուժգին է հնչում հավատի ու վերածնության, վերադարձի նրգը.

Մեճության խավար զեղանից կրկին
ես վերադարձա հրգոս և հրպարտ.
Եվ ինձ ողջունեց աղմուկը զվարթ.
Ու նոր խնդրյամբ այրեց իմ հոգին...

Տերյանի վերադարձը, որ շարունակվեց մինչև իր մահը, որի մասին նա գրել է խոստովանքային այսպիսի տողեր՝

... Անապավեն կյանքիս. կյանքիս մոլոր
Իջավ անմար մի լույս, մի հուր վերին
Եվ հեղեհեց հոգիս.—

այդ վերադարձի իրականացավ երկու ուղղությամբ՝ հայրենիքի և հեղափոխության:

Իհն մինչև տասական թվականները Տերյանի դրած բանաստեղծություններում տեղ գտան «հայրենական տան» մի շարք արժարժումներ՝ գերազանցորեն անորոշ տեսիլքի ու հեռավոր երազի կերպարանքով:

Բայց եկան հայրենիքի գոյության տարածամերձ՝ ամենածանր ժամանակները և բանաստեղծի աշխարհը սկսեց մորմոքալ նոր պատկերներով՝ «Ավերված Երա՛զ՝ հայրենական տուն»:

1913 թ. «Մշակ» լրագրի էջերում սկսեցին տպագրվել հայրենական տան ողբերգությունն ու տառապանքը, հույսն ու վերածնության սպասումը արտահայտող բանաստեղծությունները, հետագայում կաղմելով «Երկիր Նաիրի» շարքը՝ հայ քնարերգությանը երբեք հայտնի ընտիր ու բյուրեղացած շարքերից մեկը:

«Երկիր Նաիրի» շարքի հուղական բովանդակության, նրա սլաքոսի (հին իմաստով՝ տառապանքի) համար վերին աստիճանի բնորոշ է հետևյալ խոստովանությունը.

Ջրչլացա խրնդուն փառքիդ
Անցյալ ու հին փառքով երբեք,—
Սիրեցի ճեզ, անքեն հոգիդ,
Եվ երգերդ մեղմ ու բեկբեկ.

Խեղճությունդ՝ խավար ու լուռ,
Աղոթներդ՝ դառն ու ցավոտ,
Ձանգակներիդ զարկը տխուր,
Եվ խուղերիդ լույսերն աղետ...

Սա հայրենասիրական բանաստեղծության նոր որակ էր, ավելի ներհուն, մեղմախոս և տաքեւ նախորդներից, ասենք, օրինակ, Ռափայել Պատկանյանի մարտական շեփորումներից ու խրոխտ ռազմականչներից: Փոխվել էին ժամանակները, հետևապես փոխվեցին նաև հայրենասիրական զգացմունքի արտահայտման եղանակները՝ կոչի ու ահազանգի տեղը գրավեցին ծանրածանր իրականության՝ կոտորածների ու բնաջնջման սպառնալիքի առաջ հայտնված ժողովրդի հույսի և սպասման ապրումները:

Տերյանը հայրենիքի երգին դիմեց այն ժամանակ, երբ դեռ չէր պայթել պատերազմը, դեռ մթնոլորտը շնչում էր խաբուսիկ պատրանքներով, դեռ երկիրը հարաբերական խաղաղության մեջ էր: Բայց բանաստեղծը հենց նրա համար է բանաստեղծ կոչվում, որ դեպքերից շատ առաջ կռահում է սպասվող աղետը և հնչեցնում ահազանգի խոսքը.

Մի՞թե վերջին պոետն եմ ես,
Վերջին երգիչն իմ երկրի.
Մա՞հն է արդյոք, քե՞ն նինջը քեզ
Պատել, պայծա՛ն Նաիրի:

Ահով, ահա, կանչում եմ քեզ՝
Ցուլ՝, ցնորք Նաիրի՛,—
Մի՞թե վերջին պոետն եմ ես,
Վերջին երգիչն իմ երկրի...

Վ. Տերյանի տված այս հարցը ավելի պատասխան էր, քան՝ հարց, ավելի հույսի խոստում էր, քան՝ հուսահատության, ավելի արիության կոչ էր, քան՝ վհատության խոսք:

Այս ապրումների տրամաբանական շարունակությունը եղան «Երկիր Նաիրի» շարքի մյուս բանաստեղծությունները՝ գրված արդեն ողբերգական շարժարանի թվականներին: Սակայն ի տարբերություն հայ ժողովրդի ճակատագրի ողբասացների, «արցունքի հովտի» երգիչների, քրոնք, կորցրած ամեն մի հեռանկար, գուշակում էին «Մայր Հայաստանի» կործանումը, Վ. Տերյանը եղավ հայրենիքի ասպագա հառնումի ու վերածնության երգիչը, զրելով հետևյալ բանաստեղծական մանիֆեստը.

Իջնում է զիշերն անգուր ու մթին,
 Եվ այգը լացվում դառն ու մահաճու,
 Բայց հրկեզ հոգիս մորմաճում այս տաք
 Հավատում է դեռ իմ առավաթին:

Թռչ կիտվի խավառն ավելի խրթին,
 Եվ շարխինդ ճնշե հռչն իմ արյունոտ,
 Ու քող գա, քե կա, ավելի՛ շատ քաթ,
 Մեխվի զոհ երկրիս անաղձված սրտին:

Ուխտավոր անդուլ, դարերի ժառանգ
 Մի հե՛մ նախրցի, զնում եմ անկանգ.—
 Թող զուժկան զիշերն ահասաստ դավե—

Ուրբան մալքը սև՝ այնքան ևս՝ համառ,
 Երկնի՛ւր, ի՛մ երկիր, հավատով անմառ,
 Սուրբ է իմ ուղին և պրսակդ՝ վեհ...

Մյուս բանաստեղծությունը՝

Ուսես փունիկ կրակից կեկես, կեկես ճուր
 Կեղեցկությամբ ու փառով վառ ու լուսավոր:

Մյուսը՝

Երկիր իմ աղետավոր,
 Ասում եմ՝ տոկա համառ,
 Կալու է հաբուրյան օր:

Անհրևր հավատի և վերածնության այս տողերը գրվում էին ճակատագրական այն օրերին, երբ հայոց միջնորդները լցված էր հոգեվարքով, երբ դահավեժ փլուզվել էր հայ ազատագրության հնամյա լեգենդը, երբ Տերյանն ինքը հայրենիքի իրադրությունը բնութագրում էր «խաչված իմ երկիր» դարձվածքով: Խաչված երկրի դեմ նա ասպարեզ հանեց իր երկիր նախնիներ՝ սրա գոյությանը պարտադիր այնպիսի բարոյական արժեքներով, ինչպես, ազգային հպարտությունը (սերկիր նախնի, երա՛զ հեռավոր...), հավատարմությունը (սքեմ դավաճանի իմ նվարդին...), հերոսական բնավորությունը (սԱյնպես անպիտան երկրում իմ որբ, նայիր—թափված քանի կորյուն...), հայրենիքի հավերժության գեղեցկությունը (սՈրպես լեռն է մեր պայծառ տեսել հազար ձյուն...):

1915-ին «Մշակ» թերթի նոր տարվա համարում տպագրելով երեք բանաստեղծություն «Սերկիր նախնի» շարքից, Տերյանը դրանց կցել էր հետևյալ ծանոթագրությունը. «Նախնիներն պետք է հասկանալ ոչ քան պատմական, այլ իդեալական իմաստով»:

Սա շատ կարևոր, սկզբունքային նշանակություն ունեցող բացատրություն էր: Տերյանը սահմանազատվում էր հայկական հնամյա ուտոպիաներից, «Ավետյաց երկրի» ռոմանտիկական գաղափարախոսությունից, ետնաշխարհային տեսիլքների դյուբանքից՝ հայացքն ուղղելով դեպի հայրենիքի իրական կացությունն ու իրական ապագան:

Կերված ե՛մ մե՛մ—ոչ ստեղծ, գերված մի արժիվ,—
 Զարույթան դեմ վեհախոս միշտ, վատի դեմ ազնիվ:

* * * * *
 Եզրապատկան բուրգերի վառի կյտոնան,
 Արևի պես, երկիր իմ, կվառվես վառման:

Հին խոսք է՝ Լրբ միջնորդները լցվում է ամպրոպածին կայծակներով, բանաստեղծները կոհնում են այդ ամպրոպը: Վահան Տերյանը հայ իրականության մեջ այդպիսի դարմանալի կոհնող էր: Նա կանխագուշակեց ոչ միայն

Հայրենիքին սպասվող աղետը, այլև մթնոլորտում կուտակվող այն ամպրոպային լիցքերը, որոնք կոչված էին նորոգելու «ապական» ու «հին» աշխարհը։ Նա ամբողջ էությունը ընդառաջ գնաց հասունացող ամպրոպին՝ իր վերագարձը նշանավորելով այսպիսի դավանանքով.

Ուզում եմ, վաղվա ցնծության գույքակ	Ջարբե՛՛՛՛՛, Երգե՛ր իմ, մամ է՛ ճնշելու,
Կարոտս նետած լուսեղեն հետույն,	Ջինելու նորից գեղերը ցրիվ,
Վտռել երգերը, որպես դռնակ	Մեռած սրտերը կյանքի կոշելու
Ու մեռնել որպես հերոսն է՛ մեռնում...	Եվ բորբոքելու գայլույթ ու կռիվ...

Այս տրամադրությունները կային նաև միջադարձի կարոտի ու աշխան երգերում. նրա աշունը լի էր զարնան շնչով. գիշերը՝ լույսով, տխրությունը՝ անհանգստության, հեռացումը՝ վերագարձի հավատով, կարոտը՝ ներքին պայթյունների ուժով, մենությունը՝ վերածնության լիցքերով։ Այդ հակասությունների միջով էլ Տերյանը շրջվեց դեպի կյանքը, դեպի իրականությունը՝

Ջարբե՛լ է՛ հոգիս նոր կյանքի համար,—

դառնալով հայ իրականության հեղափոխական զարթոնքի մարգարեն.

Կարծես մի վերին և նուրբ հրաշքով	Որպես առվակը սարերից իջնող,
Լուսացավ իմ մեջ առավոտն անհուն—	Որպես ամպերի շարժը ասկեղեն
Ու յերև թվաց կյանքս երկնային,	Գարնան սրևող երկնում չվող։

«Վերագարձ» շարքից (1910) մինչև Հոկտեմբերյան նվագներ (1917) Տերյանն անցավ վերածնության հազվագյուտ մի ճանապարհ, այդ ճանապարհի բարձր կետում՝ հեղափոխական պայթյունի ալիքների վրա հռչակելով առհասարակ բանաստեղծի և իր իսկ կոչումը.

Դու մարգարե պիտի լինես, խաչակիր և մարտիրոս,
Խաչակիր ու խաչ պիտի ելնես,—ոչ իբրև ստրուկ, այլ հերոս...
Խոսքդ պիտի լինի դաշույն, սիրտդ՝ կրակ անավոր,
Պիտի լինես հեզ, որպես որբ, վեհանձն, որպես քաղաք...
Պիտի բանաս սիրտդ բոբրո՛ք ամեն սրտի դեմ,
Պիտի լինես միշտ հրահրուն և միշտ լուսեղեն...

Այս գիտակցության դեպքում միանգամայն բացատրելի են Տերյանի ստեղծագործության մեջ խուժած արշալույսների, մարտիրոսների, ազատության դրոշների, մրրկահավերի, ջահերի ու զանգերի պատկերները։ Մարգարե բանաստեղծի կուսումներ։

4

Վահան Տերյանը,— նորից հիշենք թուժանյանական պարբերացումը,— հայ բանաստեղծության դարգացման նոր սկիզբ էր։ Տերյանը համարձակ մի խոյանքով գնաց ստեղծագործական դժվարին խնդրի լուծման՝ հայ բանաստեղծության ավանդական պատկերային մտածողության ու ժամանակակից եվրոպական բանաստեղծական ձևերի խաչավորման—համադրությանը, տվեց տերյանական «սիւնքը»՝ հայրենի բանաստեղծական հերկի նոր որակը։

Տերյանագիտությունը, որ մեծ երախտիքներ ունի Տերյանի ժառանգության րանասիրական հետազոտության մեջ, դժբախտաբար, նույն թափով ու նույն շնչով չի անդրադարձել երևույթի գրականագիտական մեկնաբանությանը՝ պարզելու լուր աշխարհներն ու բոլոր այն լիցքերը, որոնցից կազմավորվեց բանաստեղծության նոր կառուցվածքը. Տերյանի բանաստեղծությունը:

Ոճական վայելչություն, բանաստեղծական տողի նվագայնություն, ապրումների արտահայտման թավշային դույներ, տաղաչափական նոր ձևեր, ասոնանսային հանդեր,— այս ամենը ճիշտ են, իհարկե, բայց բավարար չեն՝ բացատրելու Տերյանի բանաստեղծության նուրբ գաղտնիքները, նրա կառուցվածքային առանձնահատկությունները, պարզելու Տերյանի էությունը: Իսկ այդ գործը պետք է լինի տերյանագիտության առաջին անելիքը, առաջին հոգսը:

Տերյանի բանաստեղծությունը, իհարկե, հայտնի չափով կապված է իր նախորդների՝ և՛ հեռավոր, և՛ անմիջական նախորդների բանաստեղծության հետ: Բայց հայտնի չափով էլ տարբեր է նախորդների բանաստեղծությունից: Ոչ այնքան արտաքին-ձևական հատկանիշներով, որքան ներքին կառուցվածքով, ուր հիմնական բեռը իրենց վրա են վերցնում հոգեկան ապրումների մանրամասնությունները, և ուր ռելիեֆին փոխարինում են նրբերանգները, մարդու և արտաքին աշխարհի հարաբերության խորհային-հոգեբանական բացահայտումները:

Արևելահայ բանաստեղծության մեջ ապրումների անհատականացումը, հոգևոր դրդապատճառների ուժեղացման պրոցեսը սկսվում է դեռ Հովհ. Հովհ. հաննիսյանի ստեղծագործությունից, նորանոր գծերով հարստանում Հովհ. Թումանյանի և Ավ. Իսահակյանի բանաստեղծություններում, նոր տեսք առնում Վ. Տերյանի մոտ: Խնդիրը չի վերաբերում բանաստեղծության ընդհանուր արժեքին, այլ տեղեկներին, թեև Վ. Տերյանի բանաստեղծությունների արժեքը նույնքան մեծ է, ինչպես իր նախորդներին:

5

Վահան Տերյանի նամակագրությունից, մասնավորապես Անթառամ Միսկարյանին գրած վերին աստիճանի տաք ու անկեղծ նամակներից երևում է, թե նա ինչպես էր գնահատում մաբդկային տաղանդը՝ հոգու քնքշությունը, կարեկից վարքագիծը, հասարակական ջիղը, աշխատանքը, ազգային նվիրումը, մտավորական (ինտելիգենտ) խառնվածքը:

1913 թ. մարտի 15-ին Տերյանը գրում է. «Գիտե՞ք, մարդիկ կան, որոնք ունեն որևէ գիտության, բանաստեղծության, ընդհանրապես արվեստի ընդունակություններ, մարդիկ էլ կան, որոնք ունեն մաբդկայնության տաղանդ... Տաղանդավոր գրողները զարգարում են գրականությունը, տաղանդավոր մարդիկ զարգարում են կյանքը»³:

1913 թ. նոյեմբերի 22-ին գրած նամակում, դժգոհելով իրենց մտավորական համարող մարդկանց կրթության պակասից («սեփականից ետ են մնացել, օտարներին չեն հասնում»), դժգոհելով «սեփական նկարագիր» և «սեփական հոգի» չունենալուց, Տերյանը գտնում է, որ մարդու կուլտուրականությունը ավանդական-ազգային երևույթ է, սերնդից-սերունդ փոխանցվող

³ В а а н Т е р я н, Изданные письма, Ереван, 1970, էջ 156:

տրվածք, դաստիարակության արդյունք, ուստի և բարոյական մեծ խնդիր է համարում ազգային-կուլտուրական գործի ազնիվ ու անշահախնդիր նվիր-լալներին, հասարակական սխրագործության ընդունակ մտավորականների պատրաստումը:

Այդպիսին էր ինքը՝ Վահան Տերյանը, ԱՄ դարի հայ իրականության ամե-նալուսավոր մտավորականներից մեկը, ազգային-կուլտուրական շարժման Անձնվերը:

Տերյանի հայտնի ինքնաբնութագրությունը՝

Ի՞նչ եմ ես արվեստն իմ՝ խնդուն,
Իսկ երանքս այնքան դժվարին եմ,—

բանաստեղծական սովորական փոխաբերություն չէր ամենեին, այլ միանգա-մալն ստույգ արտահայտությունը իր կենսագրության:

Հեռավոր Գանձայից մոսկովյան միջավայրում հայտնված Վահան Տեր-Գրիգորյանը իր կոչումը տեսնում է ազգի նվիրումի մեջ, ինչպես քաղաքա-կրթության կենտրոնները մեկնած իր նախորդները՝ Խաչատուր Աբովյանից սկսած: Հաղարյան ձևավորանում, ուր խմբված էր ժամանակի կրթասեր հայ երիտասարդությունը, ուսումնական առարկաներին զուգընթաց, բանաստեղ-ծական փորձերին զուգահեռ, Տերյանը արդեն մտորում է իր հասարակական ծրագրերի շուրջը: Վ. Տերյանի «հասարակական խառնվածքը» ավելի մեծ աս-պարեզ է գտնում այն ժամանակ, երբ նա դառնում է Մոսկվայի համալսարա-նի պատմա-բանասիրական ֆակուլտետի ուսանող: Հայագիտության՝ հայոց հին գրականության և գրաբարի ուսումնասիրությունից բացի (որ նա համա-րում էր իր կյանքի վերին նպատակներից մեկը)⁴, Տերյանը ամենաեռանդուն մասնակցությունն էր բերում ժամանակի քաղաքական անց ու դարձին, որի փաստումն է նրա կալանքը Բուտիրյան բանտում (1906), այն բանտում, ուր երկու տարի անց ընկավ դարձյալ «քաղաքական անբարեհույս» Վլ. Մայա-կովսկին: Ուսանող Տերյանը համատեղում էր գրական և քաղաքական նախա-սիրությունները,— բանաստեղծական հատորների կողքին նրա ձեռքի գրքերն էին սոցիալիստական ուսմունքները մեկնաբանող աշխատությունները, Բոդ-լերի և Բլոկի բանաստեղծություններին զուգընթաց նա ուսումնասիրում էր Մարքսի «Կապիտալը»: Տերյանի հասարակական հակումներին նպաստում էին Մոսկվայի հայ գաղութի՝ ամենաերևելի գաղթօջախներից մեկի աշխույժ եռու-ղևուր, իր ընկերական շրջանակը, ուր մտնում էին Ալ. Մյասնիկյանը, Պ. Մա-կինցյանը, Յ. Խանդավյանը և առաջին հերթին, կյանքի արմատական նորոգ-ման ծրագրերով խանդավառված ոռոս մտավորականների միջավայրը, որի հետ նա կապված էր հոգեկան ամենախոր թելերով:

Վահան Տերյանը ներշնչված էր կյանքի հեղաշրջման տրամադրություն-ներով, օգտաշատ հասարակական գործի բռնուն ցանկությամբ, իսկ դրա հա-մար չափազանց կարևոր էր գտնում զգաստ ու սթափ վերաբերմունքը երևույթ-ների նկատմամբ, քննական-վերլուծական խառնվածքը:

⁴ Եամակներից մեկում Տերյանը գրում է. «Ինչպիսի գրկանքներ էլ ստիպված լինեմ կրել, ինչքան էլ ինձ համար դա ծանր լինի. ես պատրաստ եմ ամեն ինչի, միայն թե իրակա-նացնեմ երազանքս՝ կատարելապես ուսումնասիրել այդ արքայական լեզուն: Միայն այդ ժա-մանակ ես հանդիստ կլինեմ» (նույն տեղում, էջ 168):

Այս առումով ուշադրավ է 1907 թ. նրա մի նամակը, ուր իր հասարակական դավանանքի մասին Տերյանը գրում է. «Մի բան միայն կարող եմ ասել, որ քանի ղեկում, այնքան տմրանում են իմ մեջ իմ հիմնական սկզբունքները և քանի ղեկում, այնքան շատածված զգայական խոյանքը փոխարինվում է իմ մեջ խոր, համոզված էնտուզիազմով: Ասեմ ավելի պարզ: Իմ խորին համոզմունքով, ոչ մի գործ չի կարող կատարվել առանց զգացմունքի: Առավել ևս հասարակական գործը: Սակայն, վերջին դեպքում (երբ գործը հասարակական է), ավելի, քան որևէ այլ ժամանակ, բանականությունը պետք է ընթանա զգացմունքի հետ ձեռք ձեռքի տված: Այո՛, երբ հարցը սոսկ ինձ է վերաբերում, ես կարող եմ անել ինչ ուզես, բայց նրբ հարցը վերաբերում է մարդկային մասսաներին, որոնց գործն իմ գործն է, որոնց հաջողությունը իմ հաջողությունն է, ես անսպասան պարտավոր եմ խորհրդատու ունենալ ոչ միայն զգացմունքը, այլև բանականությունը: Ահա թե ինչու ես, ունենալով հանդերձ հրապուրվող բնավորություն, չեմ հրապուրվում անարխիստների և նրանց նմանների հեղափոխական ֆրազով: Ես մի քիչ ուսումնասիրել եմ հասարակական խնդիրները և դա ինձ սովորեցրել է զգոն (սակայն ոչ մեղանական-օպորտունիստական «զգոնություն» իմաստով) վերաբերվել սոցիալ-քաղաքական հարցերին: Ռումանտիկական խոյանքին այստեղ պետք է տեղ տրվի, բայց... ոչ ամբողջ տեղը, այլ միայն մի մասը»:

Այս դավանանքին Տերյանը հավատարիմ մնաց և՛ դրական-կուլտուրական, և՛ հրապարակախոսական, և՛ քաղաքական գործունեության ամբողջ ընթացքում, գրսևորելով ընդհանուր շահերի խոր գիտակցություն, մտածողության ռեալիզմ և կենտրոնացում, ազգային կուլտուրական խնդիրների ճշմարիտ, սնամեջ լողունդներից թոթափված բանական վերաբերմունք, կռահումների խորաթափանցություն:

Տերյանի էության մեջ կրկնվում էր Հովհ. Բումանյանի՝ XX դարի հեռատես մտածողի խառնվածքը՝ տերյանական գույներով: Բոլորանվեր թուժանյանական խառնվածք, որ, շնայած օրեցօր վատթարացող առողջական վիճակին, հասցնում էր լինել ամենուրեք՝ ասելու իր խոսքն ու իր պատգամը:

Բանաստեղծի ղեկավարվածության գործի կարևոր նշանաձողերն էին «Բարուն» գրական-տեսական ամսանախի ստեղծման ջանքերը (ամսանախ, որը պետք է դառնար հայ իրականության «նոր հոսանքի» ջահակիրը), Մարսիմ Գորկու հրատարակած «Հայ գրականության ժողովածուին» (1915) բերած մեծ նպաստը, «Պանթեոն» հրատարակչության հոգսերը, հայ իրականության մեջ թարգմանական հոգի շարժում ստեղծելու եռանդը, գրական փոխհարաբերությունների լայնացման ու հարստացման ծրագրերը:

Վահան Տերյանի ղեկադիրական հայացքների պակր եղավ «Հայ գրականության դալիբ օրը» դասախոսությունը՝ ազգային գրականության անցած շրջանների, գրական լեզվի զարգացման միտումների և գրականության դալիբ ծաղկման պատմա-հասարակական նախադրյալների խոր վերլուծություններով: Ազգային գրականության զարգացման նոր աստիճանի՝ համամարդկային որակի իրականացումը կապելով կյանքի հեղաշրջման հետ, Տերյանը գրում էր. «Եթե մենք չենք կամենում լինել անպտուղ ցնորոդներ և օդային ամրոցներ կառուցողներ, բնականաբար պիտի ելնենք տվյալ իրականություն-

5 Վահան Տերյան, Երկերի ժողովածու, հատ. III, էջ 167—168:

նից, պիտի հաշվի առնենք բոլոր այն հանգամանքները, որ հարկադրիչ զորություն ունեն կուլտուրական զարգացման համար... Մեր մտավոր նպատակն է՝ զարգացնել մեր բոլոր ստեղծագործ ուժերը, այլ կերպով, արտահայտել մեզ կյանքում, այսինքն՝ մտնել կուլտուրական մարդկության գերդաստանը ոչ իբրև խորթ զավակ կամ ծուլ ու խավար մի ստրուկ, այլ ձուլել մեր կյանքը համամարդկային կյանքի հոսանքին, պահպանելով մեր հոգևոր առանձնահատուկ դժերն ու դույնները»⁶:

Հրապարակախոս Տերյանի ամենանշանակալից ելույթը «Հոգևոր Հալաստան» հոդվածն էր, առաջին տերյանագետ Պողոս Մակինցյանի ճիշտ բնորոշումով՝ ապագա Հայաստանի «մարդարեական տեսիլը»:

Ավելի քան հարուստ է Վահան Տերյանի քաղաքական գործունեության պատկերը: Ուսանողական հուզումների մասնակից և հայ գյուղերում սոցիալիստական գրականություն տարածող շարքային պրոպագանդիստից Տերյանը հասավ Ռուսաստանի երևելի քաղաքական գործչի բարձունքը: Համառոտական Կենտրոնական Գործադիր Կոմիտեի անդամ, Ազգությունների Կոմիտեի քաղաքական գործերի կոմիտեի տեղակալ, ականավոր դիվանագետ՝ Լենինի տված մանդատով, «Թուրքահայաստանի մասին» սովետական ղեկարեւի նախագծի հեղինակ, Վ. Ի. Լենինի «Պետություն և հեղափոխություն», «Կարլ Մարքսի կենսագրությունը» աշխատությունների առաջին թարգմանիչ, Հյուսիսային Կովկասում ապաստան գտած հայ զաղթականների շահերի պաշտպան, — այսպիսին է մեծ Նվիրյալի գործունեության ոչ լրիվ պատկերը, այն գործչի, որ այսօր ժողովուրդների ազատագրման բոցերում, որ այնպես ներդաշնակորեն իրար բերեց իր հեղափոխության և իր հայրենի կենսական շահերը: «Բանվորական և գյուղացիական Ռուսաստանի կարմիր զորքերն են, — դրել է Տերյանը, — որ պիտի մի ղեղեցիկ օր եղբայրական ձևով մեկնեն տանջված ու կեղեքված, մահացու վտանգի մեջ գտնվող հայ գյուղացուն ու բանվորին, միայն Ռուսաստանի բանվորական և գյուղացիական խորհուրդների իշխանության կարմիր զորքերն են, որ կարող կլինեն ազատություն ավետել արյունաներկ երկրին»⁷:

* * *

Կյանքի վերջին տարիներին վերանձնական բանաստեղծությունների հետ Տերյանը դրել է նաև իր անձնական ճակատագրի մասին պատմող բանաստեղծություններ՝ մեկը մյուսից տխուր, մեկը մյուսից ազդեցիկ ու սրտաբեկ՝ «Իմ գերեզմանը թող լինի հեռվում...», «Ջյունը մազում է բարակ...», «Տնակն իմ ցուրտ ու անդարդ...»:

Իր հոգնաբեկ կյանքի դրամայի վերջին գործողությունն ներկայացնող բանաստեղծությունների շարքում է նաև հանրաճանաչ «Հրաժեշտի զագելը»: Թեև մոտալուտ վախճանի զգացումներով, մահվան կոահոմներով գրված «Հրաժեշտի զագելը» Տերյանի ամենից անանձնական բանաստեղծություններից մեկն է, կյանքի ու աշխարհի տերյանական հիմներից մեկը՝ ամբողջովին թաթախված նրա հոգու մաքրամաքուր լույսով, անցած ճանապարհի վեհություններ ու սրտի քնքշություններ:

⁶ Նույն տեղում, հատ. 11, էջ 275—276:

⁷ Նույն տեղում, էջ 347—348:

Ամեն վայրկյան սիրով տրտում ասում եմ ես մնաս բարով.
Բոքը արևին իմ բոց սրտում ասում եմ ես մնաս բարով:
Մնա՛մ բարով, ասում եմ ես, բոլոր մաքղանց շա՛ր ու բա՛րի.
Տանջվող ու ոքը Աղամորդուն ասում եմ ես, մնաս բարով:

Հրաժեշտի այս սաղմոսներից հետո՝

Գնում եմ ես մի մուրձ աշխարհ, հեռու երկիր, էլ չեմ գալու,
Բարի հիշե՛մ ինձ ձեր սրտում, մնա՛մ բարո՛ւմ, մնա՛մ բարո՛ւմ...

Բանաստեղծի այս «Կտակը» իրականացված է անմնացորդ և արժանի սրբություններով: Վահան Տերյանը, ինչպես իր կենդանության օրոք էր, մնացել է հայ ժողովրդի ամենօրյա հիացմունքին ու մաղթանքին արժանի, սիրելի անուններից մեկը, նրա հոգեկան կյանքի հավերժական ուղեկիցը:

Եվ սիրեց մեր ոգին նրան.
Պոետին այդ տխուր ու բարի...

Նույն Չարենցն է գրել՝

Նա եկավ, երգեց ու գնաց
Դեպի հեռուներն աշխարհի.
Բայց երգը իր կառչած մնաց
Ի՛ր երկրի հնավանդ ծառին...

Մեր հասարակության պատմության «գրոհի ու փոթորկի» շրջանում, 1920-ական թթ. Վահան Տերյանի բանաստեղծական ժառանգության ետմահու գնահատությունների մեջ եղել են, իհարկե, անցանկալի, կոպիտ շեշտեր: Սակայն կարճատև երեսդարձից հետո Տերյանին հիշողները իրենք առաջինը սպասել են նրա վերադարձին, նրա բարի հիշատակներին ու լուսավոր անուրջներին, նրա Հրաշքին:

Տերյանի Հրաշքը, — ինչպես բնութագրել է Ավետիք Իսահակյանը, — անբաժան է ոչ միայն ժողովրդի ամենօրյա կենցաղից՝ երգից ու ասմունքից, խոսք ու զրույցից, սերերից ու երազներից, այլև գալիք ուղիներից, նրա մշակույթի ու դրականության դարգացման հեռանկարներից:

Վահան Տերյանը ոչ միայն իր օրերի, իր ժամանակի, այլև գալիքի ու հեռանկարի բանաստեղծն է: Այս ճշմարտությունը ամենից ճիշտ և ժամանակին կոահեց Եղիշե Չարենցը, դեռ տասական թվականներին, գրական բազմազան և խայտաբղետ ուղիների հարաբերության մեջ, կողմնորոշվելով դեպի Վահան Տերյանի լուսավոր բանաստեղծությունը: Ի տարբերություն Տերյանի հետագծերով հայոց գրական անդաստանում սունկի պես հայտնված անհամար «տերյանիկների», Չարենցն իր ստեղծագործության մեջ շարունակեց տերյանական գիծը՝ աշխարհահիացումի տարերքը, շարունակեց ոչ միայն տասական թվականների երազների ու տեսիլների քնարով, այլև հեղափոխության նախօրյակի տղջակիզումի և ըմբոստացող տարերքի բանաստեղծություններով, ոչ միայն լուսավառչության, այլև հայրենապաշտության ավանդներով: Ժամանակավոր խզումից՝ «սահմանագծի» շրջանի մոլորություններից հետո Չարենցը թերևս ավելի խոր ու ավելի հստակ ըմբռնեց Վահան Տերյանի

բանաստեղծության անանց նշանակությունը հայ բանաստեղծական մշակույթի զարգացման մեջ:

Հայ բանաստեղծության տերյանական դիօր, այլևայլ ձևերով ու նրբերանգներով, իր բնական շարունակությունը գտավ Գեղամ Սարյանի ու Գուրգեն Մահարու, Պարույր Սևակի և Վահագն Դավթյանի, Համո Սահյանի և Հրաչյա Հովհաննիսյանի, Սիլվա Կապուտիկյանի և Ռազմիկ Դավթյանի ստեղծագործության մեջ, կրկին ու կրկին հաստատելով և՛ Տերյանի խոր հարադատությունը հայ բանաստեղծության տոհմիկ ավանդներին, և՛ նրա տեական նշանակությունը բանաստեղծական արվեստի նոր ուղիների ձևավորման մեջ:

ВААН ТЕРЯН

(К 90-летию со дня рождения)

Доктор филол. наук С. Б. АГАБАБЯН

(Резюме)

В статье представлен творческий путь одного из крупнейших армянских поэтов XX века Ваана Теряна от символистических стихотворений книги «Грезы сумерек» (1908) до созданных под влиянием революционной ситуации песен Возвращения и Родины.

Наряду с исследованием поэтического мира В. Теряна в статье дается также характеристика его политической и литературной деятельности